

# INUIT ATAQATIGIIT

## Inatsisartuni



Ulloq 6. juli 2018

Inatsisartut suleriaasianni § 37 imm. 1 naapertorlugu Naalakkersuisunut apeqqutit imaattut matumuuna saqqummiuppakka.

### **Naalakkersuisunut apeqqutit:**

- 1. Aalisarsinnaanermut akuersissutinik tunniussinermi suut tungavittut aallaavigineqartarpat?**
- 2. Aalisarsinnaanermut akuersissutinik tunniussinermi tungavinnut ilaatinneqartarpat qinnuteqartut aningaasanut tungatillugu allatigulluunniit atornerluisimanermut tunngasunik eqqartuussivikkoortumik eqqartuunneqarsimanersut imaluunniit pisortanut akiitsoqarnersut?**
- 3. Aalisarsinnaanermut akuersissutit aallaavigalugit aalisarnermut maannakkut akuusuni ilaannakortumik tamakkiisumilluunniit piginnittuffigisanik suliffeqarfinnik eqqartuussivitsigoortumik ingerlatsisinnaajunnaarsitaasimasunik akoqarnersut Naalakkersuisunit tamakkiisumik ilisimaneqarnerluni?**

(Inatsisartunut ilaasortaq Sofia Geisler, Inuit Ataqatigiit)

### **Tungavilersuut:**

Inuussutissarsiummut allamut, tassalu sanaartornermut atatillugu, pisortat suliarinnittussarsiornerannut atatillugu neqerooruteqartut suliffeqarfiit Namminersorlutik Oqartussanut Kommunenuunniit akiitsoqannginnerannik uppersaammik tunniussinissamut piumasaqaatitalimmik inatsimmik peqanngitsoq paasivara.

Taamaattoq Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaat nr. 3, 1996-eersumi §7 naapertorlugu Namminersorlutik Oqartussat Kommunellu *piumasaqarsinnaapput* suliffeqarfiit pisortanut akilerneqanngitsunik *akiitsoqannginnissaannik*.

Periarfissaq taanna suliarinnittussarsiortoqartillugu A/S INI-mit Iserimillu atorneqartarpoq, soorlu aamma periarfissaq taanna Namminersorlutik Oqartussanit Kommuneniillu atorneqartartoq ilisimaneqartoq.

Inuiaqatigiinniit atugassanngortinneqartarput pisassiissutit aningaasarpassuarnik naleqarput, pingaaruteqarporlu pisassiissutinik atuisassanngortinneqartut unneqqarissuunerisa uppersassuseqarnerisalu apeqquserneqannginnissaat, tamannalu tunuliaqutaavoq Naalakkersuisunut taamatut apeqquteqarninnut.

Apeqqutit ullut qulit qaangiutsinnagit akineqarnissaat kissaatigaara.